

**902.**

1444 November 29

***Urban Brauer verpfündet sein Haus.***

fol. 167v Urban Bruwir hat seyn husz czu eynem phande eyngesaczt dem jungin Passegk und Schuczin bruwir vor 23 alde ß gr. Davor er sy keyn dem rate vorsaczt hat, ab er sy sulchis geldis keyn dem rathe nicht beneme, daz er sich sulchir schuld an dem husze vor ydirmenlichen daran irholen sullen. Actum dominica ante Andree anno domini etc. XLIIII<sup>o</sup>.  
Schr(eibe ?) den kauff umbe den steynbruch uff dem Kolberge.

**903.**

1443 --

***Nickel Hoburg verkauft einen Acker.***

fol. 168r Actum apud proconsulen Oswald Kaufman et suorum consedentium anno etc. XLIII<sup>o</sup> hat Nickel Hoburgk bekanth, daz er Hanszin Cramer eyn agkir an Mergintalir flur gelegen vorkauft hab, doruff der pharrer czu Mergintal meynt teczschem und gerechtikeit czu haben, des sich Hoburgk biz her uff gehalten hat und dobey gereth und gelobit, waz gerechtikeit des teczschins czu Hanszen Cramers agkir, den er oin vorkauft hat, mit rechte bracht wirdit, des wolle er oin eyn irstatung thun und schadinloz benemen an arge und geverde.

**904.**

1445 Februar 18

***Gotschalk aus Lauterbach verzichtet auf Ansprüche auf ein ererbtes Gut.***

fol. 168r Actum feria quinta ante reminiscere hat Gotschalck czu Lutirbach sich von seyn und synis weibis weyn vorzihen sulchir gerechtikeit und anirstorben gutis Jocoff Lindners seligin zu Wissinborn und dorczu er meynte gerechtikeit czu haben. Gereth und gelobit, daz er Nickel und Hanszen Rodir, dy erbnemen Lindners, umbe sulche anirstorben gutir nicht anreden noch vor keynem gerichte beteidingen wil, nach nymandis von irin wegin an arge list. Anno etc. Xlquinto.